



REPUBLIKA E SHQIPËRISË
KOMISIONI QENDROR I ZGJEDHJEVE

KOMISIONI RREGULLATOR

Data: 18 Shkurt 2022

Nr.: 21

V E N D I M

P Ë R

ORGANIZIMIN E PUNËS NË VENDIN E NUMËRIMIT TË VOTAVE, RADHËN E VEPRIMEVE GJATË DORËZIMIT TË MATERIALEVE ZGJEDHORE, NUMËRIMIT TË VOTAVE DHE NXJERRJES SË REZULTATIT TË ZGJEDHJEVE PËR ZONËN E ADMINISTRIMIT ZGJEDHOR PËR ZGJEDHJET E PJESSHME PËR KRYETAR NË BASHKITË SHKODËR, DIBËR, DURRËS, VORË, RROGOZHINË DHE LUSHNJË, QË DO TË ZHVILLOHEN MË DATË 6 MARS 2022

Në mbështetje të Dekretit nr. 13 438, datë 20.01.2022, të Presidentit të Republikës, “Për caktimin e datës së Zgjedhjeve të pjesshme vendore për kryetar bashkie për disa njësi të qeverisjes vendore”, të nenit 20, pika 1, shkronjat “a” e “b”, dhe 3, të nenit 22, pika 3, të nenit 115 e vijues të ligjit nr. 10019, datë 29.12.2008 ,“Kodi Zgjedhor i Republikës së Shqipërisë”, të ndryshuar, me propozimin e Komisionerit Shtetëror të Zgjedhjeve

V E N D O S I :

K R E U I

T Ë P Ë R G J I T H S H M E

N e n i 1

Q ë l l i m i

Ky vendim ka për qëllim të detajojë rregullat për mënyrën e organizimit të punës, radhën e veprimeve gjatë dorëzimit të materialeve zgjedhore nga Komisioni i Qendrës së Votimit në Vendin e Numërimit të Votave, për detyrat dhe mënyrën e funksionimit të KZAZ-së dhe të anëtarëve të Grupit të Numërimit të Votave, gjatë procesit të numërimit të votave dhe nxjerrjes së rezultatit të zgjedhjeve për Zonën e Administrimit Zgjedhor.

Neni 2

Detyrat e Grupit të Numërimit të Votave

1. Komisioni i Zonës së Administrimit Zgjedhor (KZAZ) organizon punën dhe garanton funksionimin korrekt të procesit të marrjes në dorëzim të materialeve zgjedhore, të procesit të numërimit të votave dhe nxjerrjes së tabelës përmbledhëse të rezulttit të zgjedhjeve për Zonën e Administrimit Zgjedhor.
2. Grupi i Numërimit të Votave (GNV) nxjerr rezultatin e zgjedhjeve për çdo qendër votimi që numëron.
3. Grupi i Numërimit të Votave përbëhet nga 4 (katër) anëtarë, ku 1 (një) nga anëtarët është numëruar i parë, 1 (një) sekretar dhe 2 (dy) anëtarë.
4. Grupi i Numërimit të Votave funksionon minimalisht me 2 (dy) anëtarë.
5. Një grup numërimi numëron jo më pak se 5 (pesë) dhe jo më shumë se 10 (dhjetë) QV.

Neni 3

Teknologjia mbështetëse e numërimit të votave

1. Teknologjia mbështetëse e numërimit të votave instalohet në çdo VNV. Çdo tavolinë numërimi është e pajisur me sistemin e teknologjisë mbështetëse përkatëse.
2. KZAZ-ja kujdeset për ruajtjen nga dëmtimet e jashtme të kësaj teknologjie nga momenti i fillimit të procesit të numërimit të votave në VNV, deri në nxjerrjen e rezulttit të Zonës së Administrimit Zgjedhor.
3. Grupi i numërimit të votave është përgjegjës për ekspozimin e çdo flete votimi në kamer, sipas procedurave të parashikuara në këtë vendim.

KREU II

MARRJA NË DORËZIM E MATERIALIT ZGJEDHOR NGA KZAZ-JA

Neni 4

Caktimi i grupeve të marrjes në dorëzim

1. Për marrjen në dorëzim të kutisë të votimit me fletët e votimit dhe të kutisë me materialet e votimit nga KQV-ja, KZAZ cakton një ose më shumë grupe të marrjes në dorëzim.
2. Grupet e marrjes në dorëzim përbëhen nga 2 (dy) anëtarë të KZAZ-së, me përkatësi të ndryshme politike, të propozuar përkatësisht nga kryetari dhe zëvendëskryetari i KZAZ-së.
3. Nëse është e nevojshme, KZAZ-ja cakton 2 (dy) persona në ndihmë për çdo grup të marrjes në dorëzim, nga lista e anëtareve të GNV-ve, të cilët merren kryesisht me sistemin e kutive nën drejtimin e KZAZ-së. Në caktimin e tyre duhet patur parasysh përkatësia politike dhe baraspeshimi

shumicë-opozitë. Propozimet për caktimin e këtyre 2 (dy) personave bëhen nga kryetari dhe zëvendëskryetari i KZAZ-së.

Neni 5

Detyrat e grupit të marrjes në dorëzim

1. Grupi i marrjes në dorëzim të materialeve zgjedhore, caktohet dhe funksionon vetëm për marrjen në dorëzim të materialeve zgjedhore të sjella nga KQV-të në VNV.
2. Kutia/kutitë e votimit me fletët e votimit dhe kutia me materialet e votimit të çdo QV-je merren në dorëzim sapo ato mbërrijnë në VNV, sipas rregullave të përcaktuara në këtë vendim.
3. Grupet e marrjes në dorëzim, në asnjë rast nuk mund të refuzojnë marrjen në dorëzim të kutisë së votimit me fletët e votimit, të kutisë me materialet e votimit, të çdo QV-je apo materialeve të tjera të logjistikës zgjedhore të cilat dorëzohen nga KQV-të në VNV.

Neni 6

Marrja në dorëzim e materialit zgjedhor

1. Gjatë procesit të marrjes në dorëzim të materialit zgjedhor, grupi i marrjes në dorëzim ndjek këtë procedurë:
 - a) Merr nga sekretari i KZAZ-së, dosjen e KQV-së përkatëse, e cila është plotësuar gjatë dhënies së bazës materiale zgjedhore nga KZAZ-ja në KQV. Kjo dosje përmban Procesverbalin e dorëzimit të kodeve të sigurisë të vulave dhe modelin krahasues të vulës së Kryetarit të KQV-së.
 - b) Shënon në Procesverbalin e Marrjes në Dorëzim numrat e kodeve të sigurisë të vulave me të cilat është mbyllur kutia/kutitë e votimit dhe kutia me materialet e votimit.
 - c) Verifikon në çast përputhjen e numrave të kodeve të sigurisë së vulave, me të cilat janë mbyllur kutia/kutitë e votimit dhe kutia e materialeve të votimit, me numrat e kodeve të sigurisë të vulave të shënuara në procesverbalin e dorëzimit të kodeve të sigurisë të vulave nga KZAZ-ja në KQV.
 - i. Në rast mospërputhjeje të numrave të kodeve të sigurisë të vulave, grupi i marrjes në dorëzim informon menjëherë KZAZ-në për mospërputhjen dhe i kërkon asaj që kutia të shënohet “KUTI E PARREGULLT”.
 - ii. KZAZ-ja verifikon menjëherë mospërputhjen e konstatuar nga grupi i marrjes në dorëzim, dhe merr vendim për vlerësimin e kutisë sipas shkronjës “f” të këtij neni.

- iii. Mospërputhjet e konstatuara shënohen nga grupi i marrjes në dorëzim në Procesverbalin e Marrjes në Dorëzim, dhe nga KZAZ-ja në Librin e Protokollit të Mbledhjeve dhe Procesverbalin e Konstatimit.
- ç. Verifikon nëse mungojnë ose janë këputur një ose më shumë vula me kode sigurie.
- d. Verifikon nëse vendosja e vulave me kodet e sigurisë është bërë në mënyrë të tillë që lejon hapësira midis trupit të kutisë dhe kapakut të saj.
- dh. Verifikon nëse kutia ka në trupin apo në kapakun e saj thyerje ose çarje që lejojnë futjen apo nxjerrjen e fletëve të votimit apo materialit tjetër të votimit.
- e. Verifikon nëse kutia është e llojit, formës ose përmasave të ndryshme nga ato të përcaktuara me Vendimin e KQZ-së.
- ë. Në rast se Grupi i Marrjes në Dorëzim, gjatë marrjes në dorëzim të kutisë së votimit me fletët e votimit dhe të kutisë me materialet e votimit konstaton të paktën njërën nga parregullsitë e përcaktuara në shkronjat “c”, “ç”, “d”, “dh”, “e”, njofton menjëherë KZAZ-në dhe i kërkon asaj që kutia përkatëse të shënohet “KUTI E PARREGULLT”. KZAZ-ja verifikon menjëherë parregullsinë dhe merr vendim për vlerësimin e kutisë.
- f. KZAZ-ja, kur konstaton parregullsitë në shkronjat “c”, “ç”, “d”, “dh”, “e”, vlerëson kutinë si të parregullt, i vendos etiketën “KUTI E PARREGULLT” dhe i kërkon menjëherë operatorit/ndihmësit teknik ta hedhë këtë fakt në sistemin elektronik.
- g. Të gjitha mospërputhjet apo parregullsitë e konstatuara për secilën kuti votimi me fletët e votimit ose për secilën kuti me materialet e votimit të deklaruara të parregullta, shënohen nga KZAZ-ja në Librin e Protokollit të Mbledhjeve dhe në Procesverbalin e Konstatimit dhe nga grupi i marrjes në dorëzim në Procesverbalin e Marrjes në Dorëzim.
- gj. Grupi i Marrjes në Dorëzim plotëson Procesverbalin e Marrjes në Dorëzim të materialeve zgjedhore nga KQV-ja përkatëse, sipas formularit tip të përgatitur nga KQZ-ja.
- h. Procesverbali i Marrjes në Dorëzim nënshkruhet nga anëtarët e grupit të marrjes në dorëzim, kryetari dhe sekretari i KQV-së si dhe punonjësi i Policisë së Shtetit, i caktuar për shoqërimin e materialeve zgjedhore nga KQV-ja në VNV.
- i. Origjinali i Procesverbalit të Marrjes në Dorëzim, administrohet nga KZAZ-ja, kopje të tij i jepen kryetarit, sekretarit të KQV-së dhe punonjësit të Policisë së Shtetit, i cili largohet menjëherë me marrjen e kopjes së procesverbalit.

Neni 7

Kutitë e deklaruara “KUTI E PARREGULLT”

1. Në rastet kur për një qendër votimi, gjatë marrjes në dorëzim të kutisë së votimit dhe kutisë së materialeve të votimit:
 - a) kutia e votimit me fletët e votimit është vlerësuar “KUTI E PARREGULLT”, atëherë kutia me fletët e votimit dhe kutia përkatëse me materialet e votimit vendosen në këndin e kutive të parregullta;
 - b) kutia me fletët e votimit është marrë në dorëzim e rregullt dhe kutia e materialeve të votimit është vlerësuar nga KZAZ-ja “KUTI E PARREGULLT”, ajo i nënshtrohet procedurave të hapjes dhe vlerësimit, së bashku me kutinë/kutitë e votimit me fletët e votimit. Në çdo rast, parregullsitë që kanë çuar në vlerësimin e kësaj kutie si “KUTI E PARREGULLT”, shënohen në Librin e Protokollit të Mbledhjeve dhe në Procesverbalin e Konstatimit.
 - c) Kutitë e votimit, të përcaktuara si “KUTI E PARREGULLT”, në asnjë rast dhe për asnjë arsye nuk hapen nga KZAZ-ja dhe nuk i kalojnë GNV-ve për vlerësim. Këto kuti, dërgohen në KQZ, së bashku me kutinë e materialeve të votimit për nevoja të hetimit administrativ.
 - ç) Kutitë me fletët e votimit të vlerësuara si “KUTI E PARREGULLT”, vendosen në vendin e veçantë të caktuar nga KZAZ-ja për kutitë e parregullta, së bashku me kutinë e materialeve të votimit të QV-së përkatëse.

Neni 8

Sistemimi i kutive me fletët e votimit dhe kutitë me materiale të votimit

në VNV

1. KZAZ-ja cakton paraprakisht vendin ku do të vendosen kutitë e votimit dhe kutitë me materiale të votimit para numërimit, si dhe kutitë e votimit dhe kutitë me materiale të votimit pas numërimit, sipas Planvendosjes Orientuese bashkëlidhur Vendimit të Komisionit Rregullator nr. 3, datë 9.2.2021, si dhe një hapësirë për kutitë e vlerësuara “KUTI E PARREGULLT”.
2. Sapo kutitë e votimit dhe kutitë me materiale të votimit, janë marrë në dorëzim nga grupet e marrjes në dorëzim, ato vendosen në vendin e caktuar paraprakisht nga KZAZ-ja, brenda të njëjtit mjedis ku kryhet numërimi i votave, i cili duhet të jetë i garantuar nga çdo ndërhyrje e personave të paautorizuar. Ky proces mbikëqyret nga KZAZ-ja.
3. Kutitë e votimit dhe kutitë e materialeve të votimit, renditen sipas numrit të Qendrës së Votimit. Qendrat e votimit renditen sipas rendit rritës së tyre. E para në radhë duhet të jetë QV-ja me numër rendor më të vogël dhe e fundit QV-ja me numër rendor më të madh. QV-të “bija” vendosen menjëherë pas QV-

së “mëmë”. Kutitë e një QV-je vendosen në pozicion vertikal njëra mbi tjetrën, poshtë kutia e materialeve të votimit dhe sipër saj kutia e votimit me fletët e votimit.

KREU III FILLIMI I PROCESIT TË NUMËRIMIT

Neni 9

Personat e pranishëm në VNV

1. Gjatë procesit të numërimit të votave në VNV janë të pranishëm vetëm:
 - a. anëtarët dhe sekretari i KZAZ-së;
 - b. anëtarët e Grupeve të Numërimit të Votave të caktuar me vendim të KZAZ-së;
 - c. përfaqësuesit e akredituar të medias;
 - ç. vëzhguesit e subjekteve zgjedhore;
 - d. vëzhguesit e tjerë të akredituar;
 - dh. kandidatët;
 - e. operatorët e teknologjisë mbështetëse të numërimit të votave;
 - ë. personeli teknik për mbarëvajtjen e sistemit të kamerave;
 - f. stafi i KQZ-së i pajisur me autorizim nga KQZ-ja.
2. Të gjithë personat e pranishëm në VNV, duhet të jenë të pajisur me dokument identifikimi për të verifikuar identitetin e tyre.
3. Personat e përmendur në shkronjat “c”, “d”, “dh”, “e”, dhe “f”, të pikës 1, të këtij neni, duhet të jenë të pajisur me dokumentacionin përkatës, akreditim apo autorizim, nga Komisioni Qendror i Zgjedhjeve apo Komisioni i Zonës së Administrimit Zgjedhor.
4. KZAZ-ja merr masa dhe është përgjegjëse për moslejimin në VNV të personave të tjerë, përveç atyre të parashikuar në pikën 1, të këtij neni.

Neni 10

Veprime paraprake të KZAZ-së

KZAZ-ja pasi sigurohet se janë marrë në dorëzim të gjitha kutitë e votimit dhe kutitë e materialeve të votimit dhe pasi është siguruar që të gjithë anëtarët e GNV-ve, kanë marrë trajnimin e nevojshëm, merr masat paraprake për fillimin e procesit të numërimit të votave si më poshtë:

- a) sigurohet që Vendi i Numërimit të Votave është gati për fillimin e procesit të numërimit të votave;

- b) sigurohet që anëtarët e Grupeve të Numërimit janë prezent në VNV dhe janë të ulur në tavolinat përkatëse të numërimit;
- c) grupet e Numërimit janë të pajisur me materialet e nevojshme logjistike për procesin e numërimit të votave;
- ç) verifikon që të pranishëm në VNV, janë vetëm personat e parashikuar në nenin 9, të këtij vendim;
- d) merr konfirmimin nga operatori teknik për funksionimin normal të teknologjisë mbështetëse, të numërimit të votave.

Neni 11

Fillimi i procesit të numërimit të votave

1. KZAZ-ja merr vendim për fillimin e procesit të numërimit të votave pasi ka marrë në dorëzim të gjitha kutitë e votimit me fletët e votimit dhe kutitë e materialeve të votimit nga të gjitha QV-të në juridiksionin e saj. Në vendimin për fillimin e numërimit të votave shënohet ora e saktë e fillimit të procesit të numërimit të votave. Kryerja e procedurave për veprimet paraprake të përcaktuara në nenin 10 dhe ora e fillimit të procesit të numërimit të votave shënohen në Librin e Protokollit të Mbledhjeve të KZAZ-së.
2. Kutitë e votimit me fletët e votimit të pranuar si të rregullta në çdo rast u nënshtrohen procedurave të hapjes dhe numërimit në VNV, sipas procedurave të këtij vendimi.
3. Procesi i numërimit vazhdon në mënyrë të pandërprerë deri në numërimin e të gjitha kutive të pranuar të rregullta nga ana e KZAZ-së. Procesi i numërimit ndërpritet me vendim të KZAZ-së, vetëm për shkaqe që nuk varen nga administrata zgjedhore dhe që pengojnë procesin normal të numërimit. Shkaqet argumentohen në Librin e Protokollit të Mbledhjeve të KZAZ-së, përfshirë dhe vendimin për rifillimin e numërimit.
4. Refuzimi për të numëruar, sjell shkarkimin e menjëhershëm të personave të ngarkuar për numërimin ose sipas rastit, KZAZ-së.
5. Refuzimi për të numëruar kutinë e pranuar si të rregullt përbën vepër penale dhe ndëshkohet sipas nenit 330/a të Kodit Penal.

KREU IV

PROCEDURAT QË NDIQEN PËR NUMËRIMIN E VOTAVE NGA GRUPI I NUMËRIMIT TË VOTAVE

Neni 12

Veprime paraprake të GNV-së

1. Sekretari i Grupit të Numërimit ndjek procedurën si më poshtë:

- a) Nën kujdesin e një anëtari të ngarkuar nga KZAZ-ja, merr me radhë dhe sipas numrit rendor rritës të qendrave të votimit, kutinë e votimit me fletët e votimit të vetëm një Qendre Votimi dhe e vendos atë pranë tavolinës së Grupit të Numërimit.
- b) Sekretari i GNV-së për çdo qendër votimi, vendos/ngjit në tavolinën e paracaktuar nga KZAZ-ja, etiketën adezive dhe shkruan numrin e qendrës së votimit që numërohet.
- c) Merr nga sekretari i KZAZ-së, dosjen e KQV-së përkatëse, e cila është plotësuar gjatë dhënies së bazës materiale zgjedhore nga KZAZ-ja në KQV. Në dosje ndodhet Procesverbali i dorëzimit të kodeve të sigurisë së vulave dhe modeli krahasues i vulës së kryetarit të KQV-së.

Neni 13

Numërimi i votave

1. Numëruesi i parë vendos mbi tryezë kutinë e votimit me fletët e votimit dhe e ekspozon në kamera për jo më pak se 2 (dy) sekonda në faqen anësore ku është vendosur etiketa me numrin e qendrës së votimit, e hap atë, duke këputur vulat me kodet e sigurisë dhe nxjerr nga kutia e votimit, Procesverbalin e Mbylljes së Votimit dhe raportin e mbylljes së identifikimit elektronik të zgjedhësve i printuar nga PEI.
2. Fillimisht Grupi i Numërimit të Votave kryen procedurën e verifikimit të të dhënave në Procesverbalin e Mbylljes së Votimit.
3. Në rast se Procesverbali i Mbylljes së Votimit, gjendet në kutinë e votimit dhe të gjithë rubrikat e tij janë plotësuar sipas nenit 113, të ligjit nr. 10019 datë 29.12.2008, “Kodi Zgjedhor i Republikës së Shqipërisë”, i ndryshuar, atëherë numërimi vazhdon sipas procedurave të përcaktuara nga ky nen. Në të kundërt, KZAZ-ja plotëson Procesverbalin e Konstatimit dhe GNV-ja vepron sipas përcaktimeve të nenit 15, të këtij vendimi.
4. Pas nxjerrjes së Procesverbalit të Mbylljes së Votimit, numëruesi i parë dhe anëtarët e Grupit të Numërimit, nxjerrin nga kutia Procesverbalin e Vulosjes dhe fletët e votimit dhe duke i shpalosur fletët e votimit dhe vendosur ato mbi tryezë me pjesën e pasme të fletës nga ana e sipërme.
5. Fletët e votimit të shpalosura dhe të stivuara numërohen nga numëruesi i parë, i cili, në përfundim të numërimit, ia bën të ditur shifrën anëtarëve të grupit dhe vëzhguesve të subjekteve zgjedhore.
6. Shifra e deklaruar verifikohet me shifrën për pjesëmarrjen e zgjedhësve të shënuar në Procesverbalin për Mbylljen e Votimit dhe me raportin e mbylljes së identifikimit elektronik nëpërmjet PEI. Në rast se ka mospërputhje ndërmjet procesverbalit për mbylljen e votimit me raportin e mbylljes së identifikimit elektronik të zgjedhësve nga PEI, GNV i referohet shifrave të raportit të PEI, përveç rasteve kur procedura e votimit është zhvilluar edhe në mungesë të PEI-t.

7. Nëse shifrat nuk përputhen ose nëse kërkohet nga ndonjë prej anëtarëve të Grupit të Numërimit, numëruesi i parë është i detyruar të rifillojë edhe njëherë numërimin e fletëve të votimit.
8. Në rast se nga verifikimet e kryera konstatohen mospërputhje, atëherë GNV-ja ose cilido nga vëzhguesit e subjekteve zgjedhore që bën konstatimin, njofton menjëherë KZAZ-në për mospërputhjet. Njoftimi bëhet me ngritjen e dorës dhe pa lëvizur nga vendi.
9. Ngritja e dorës pezullon çdo veprim të mëtejshëm të GNV-së, deri sa KZAZ-ja të njihet me çështjen dhe ta verifikojë atë. Në rast se KZAZ-ja konfirmon pasaktësinë, e pasqyron atë në Procesverbalin e Konstatimit.
10. KZAZ-ja vetëm pas regjistrimit të pasaktësisë ose parregullsisë në Procesverbalin e Konstatimit, merr vendim për vazhdimin e procedurave të numërimit të votave nga GNV-ja dhe vendimi i bëhet i ditur menjëherë GNV-së.

Neni 14

Rastet kur hapet kutia e materialeve të votimit

1. Kutia e materialeve të votimit hapet gjatë procesit të numërimit të votave në VNV vetëm në rastet kur Procesverbali i Mbylljes së Votimit mungon në kutinë e votimit me fletët e votimit, i shoqëruar me raportin e mbylljes së identifikimit elektronik të zgjedhësve, ose nuk janë plotësuar të dhënat sipas përcaktimeve të nenit 113 të Kodit Zgjedhor.
2. Grupi i Numërimit ose cilido nga vëzhguesit e subjekteve zgjedhore që bën konstatim, njofton menjëherë KZAZ-në për problemin. Njoftimi bëhet me ngritjen e dorës dhe pa lëvizur nga vendi.
3. Ngritja e dorës pezullon çdo veprim të mëtejshëm të GNV derisa KZAZ-ja të njihet me çështjen dhe ta verifikojë atë.
4. Në rast se KZAZ-ja konfirmon mungesën e Procesverbalit të Mbylljes së Votimit në kutinë e votimit, pasaktësi ose parregullsi në plotësimin e tij, ose mungesën e raportit të mbylljes së identifikimit elektronik të zgjedhësve pasqyron faktet në Procesverbalin e Konstatimit. Vetëm pas regjistrimit të pasaktësisë ose parregullsisë në Procesverbalin e Konstatimit, KZAZ-ja merr vendim për vazhdimin e procedurave të verifikimit të materialit të votimit dhe pezullimin e numërimit të votave nga Grupi i Numërimit. Vendimi i marrë nga KZAZ-ja i bëhet i ditur menjëherë GNV.
5. Pas njohjes me vendimin e KZAZ-së, numëruesi i parë vendos kutinë me fletët e votimit, numërimi i së cilës është pezulluar, pranë tavolinës së numërimit dhe merr kutinë e materialeve të votimit të qendrës së votimit përkatëse.

Neni 15

Hapja e kutisë së materialeve të votimit

Procedurat dhe radha e veprimeve të GNV-së

1. Numëruesi i parë hap kutinë e materialeve të votimit, duke këputur vulat me kodet e sigurisë. Në fillim verifikohet nëse në kuti ndodhet Procesverbali për Mbylljen e Votimit, i plotësuar sipas nenit 113 të Kodit Zgjedhor dhe raporti i mbylljes së identifikimit elektronik të zgjedhësve.
2. Kur Procesverbali për Mbylljen e Votimit i plotësuar sipas nenit 113 të Kodit Zgjedhor dhe/ose raporti i mbylljes së identifikimit elektronik të zgjedhësve, gjenden në kutinë e materialeve të votimit, GNV ia dorëzon atë KZAZ-së e cila pasqyron faktin në Procesverbalin e Konstatimit.
3. Pas kryerjes së procedurave të pikës 1 dhe 2 të këtij neni, Sekretari i Grupit të Numërimit shënon numrat e kodeve për Mbylljen e kutisë së materialeve të votimit, në Procesverbalin e Grupit të Numërimit që përdoret në këtë procedurë, e fut atë në kutinë e materialeve të votimit, dhe kopje të tij ia dorëzon KZAZ-së. Më pas numëruesi i parë i Grupit të Numërimit mbyll kutinë e materialeve të votimit me vulat me kode sigurie.
4. Numëruesi i parë vendos kutinë e materialeve të votimit pranë tavolinës së numërimit dhe merr kutinë e votimit të qendrës së votimit përkatëse, numërimi i së cilës ishte pezulluar. GNV-ja vazhdon me numërimin e votave, sipas procedurave të përcaktuara në nenin 13 të këtij vendim.
5. Kur Procesverbali për Mbylljen e Votimit nuk gjendet në kutinë e materialeve të votimit apo nuk është plotësuar sipas nenit 113 të Kodit Zgjedhor, dhe/ ose kur raporti i mbylljes së identifikimit elektronik të zgjedhësve nuk gjendet në këtë kuti, Grupi i Numërimit plotëson Procesverbalin e Konstatimit dhe më pas ndjek këto procedura:
 - a) verifikon nëse në kuti ndodhen:
 - i) zarfi “FLETË VOTIMI TË PAPËRDORURA”;
 - ii) zarfi “FLETË VOTIMI TË DËMTUARA”;
 - iii) zarfi “VËRTETIME TË IDENTIFIKIMIT ELEKTRONIK TË ZGJEDHËSVE”;
 - iv) lista e zgjedhësve, përfshirë edhe regjistrin e posaçëm;
 - v) origjinalet e vendimeve të KQV-së dhe formularët tip të papërdorur të vendimeve të KQV-së;
 - vi) vula e KQV-së;
 - vii) vula e kryetarit të KQV-së;
 - viii) vulat me kodet e sigurisë të papërdorura;
 - ix) vulat me kodet e sigurisë të dëmtuara, nëse ka;
 - x) raporti i mbylljes së PEI;
 - xi) libri i Protokollit të Mbledhjeve të KQV-së;

- b) Numëruesi i parë krahason vulën e kryetarit të KQV-së me modelin krahasues dhe mendimin e tij ia bën të ditur anëtarëve të grupit të numërimit;
- c) Pasi ka kryer procedurat e mësipërme, Numëruesi i Parë numëron:
- xii) fletët e votimit të papërdorura;
 - xiii) fletët e votimit të dëmtuara;
 - xiv) numrin e zgjedhësve që kanë votuar, sipas nënshkrimeve që kanë bërë në listën e zgjedhësve, (në rastet kur ka vendim të KQV-së për të vijuar votimin duke zbatuar procedurat për identifikimin e zgjedhësit pa PEI apo emri i tyre është shënuar në regjistrin e posaçëm të zgjedhësve).
 - xv) numrin e zgjedhësve që janë identifikuar nga PEI, sipas numrit në raportin e mbylljes printuar nga PEI.
- ç) Për çdo rast, të parashikuar në shkronjën “c” të kësaj pike, Numëruesi i Parë në fund të numërimit ia bën të ditur shifrën anëtarëve të Grupit të Numërimit dhe vëzhguesve të subjekteve zgjedhore. Nëse kërkohet rinumërim nga ndonjë prej anëtarëve të Grupit të Numërimit, numëruesi i parë është i detyruar të rifillojë edhe një herë numërimin.
- d) Numëruesi i parë, hedh të dhënat për numrin total të fletëve të votimit të dorëzuara në KQV, sipas dokumentacionit shoqërues të tyre.
- dh) Numëruesi i parë, hedh të dhënat në Tabelën e Rezultateve për Qendrën e Votimit për:
- i) numrin e zgjedhësve që kanë votuar;
 - ii) fletë votimi të papërdorura;
 - iii) fletë votimi të dëmtuara.
- e) Sekretari i Grupit të Numërimit shënon numrat e kodeve në Procesverbalin e Mbylljes së Kutisë së Materialeve të Votimit, e fut atë në këtë kuti dhe më pas numëruesi i parë i Grupit të Numërimit mbyll kutinë e Materialeve të Votimit me vulat me kode sigurie. Kopje të këtij procesverbali i dorëzohet KZAZ-së e cila shënon numrat e kodeve të vulave të sigurisë në Librin e Protokollit .
- ë) Numëruesi i parë e vendos Kutinë e Materialeve të Votimit pranë tavolinës së numërimit, dhe merr kutinë e votimit të qendrës së votimit përkatëse, numërimi i së cilës ishte pezulluar. GNV vazhdon me numërimin e votave, sipas procedurave të përcaktuara në nenin 13 e 16 të këtij vendimi.

Neni 16

Llojet e votave dhe kriteret për vlerësimin e votës

1. Fletët e votimit ndahen në vota të vlefshme dhe në vota të pavlefshme.

2. Votat e vlefshme të parashikuar në nenin 117, pika 2, të Kodit Zgjedhor, janë vetëm fletët e votimit, në të cilat është votuar qartësisht vetëm për njërin nga kandidatët për kryetar bashkie/ subjektet zgjedhore.
3. Vota të pavlefshme janë fletët e votimit kur:
 - a) fleta e votimit nuk ka të njëjtën madhësi, ngjyrë ose formë me fletën e votimit të miratuar nga KQZ-ja;
 - b) fletës së votimit i mungojnë vulat e parashikuara në nenin 103 të këtij Kodi;
 - c) në fletën e votimit janë bërë shënime apo shenja që bëjnë të pamundur vlerësimin e votës;
 - ç) në fletën e votimit janë bërë shënime në favor ose në disfavor të subjekteve të caktuara zgjedhore;
 - d) është votuar për më shumë se një nga subjektet zgjedhore/ kandidatët për kryetar bashkie në fletën e votimit;
 - dh) nuk është votuar për asnjë nga subjektet zgjedhore / kandidatët për kryetar bashkie në fletën e votimit;
 - e) nuk është e qartë se për kë është votuar; ose
 - ë) zgjedhësi ka votuar për një person apo subjekt që nuk është në fletën e votimit.
4. Grupi i Numërimit për vlerësimin e çdo vote synon të identifikojë sa të jetë e mundur qëllimin e zgjedhësit.

Neni 17

Vlerësimi i Votave

1. GNV-ja bën ndarjen e hapësirës së tavolinës së numërimit, duke përcaktuar vendet e veçanta për fletët e votimit: të vlefshme, të pavlefshme, të kontestuara. Në hapësirën e tavolinës së numërimit të caktuar për votat e vlefshme, GNV-ja përcakton vende të veçanta për grupime të fletëve të votimit të vlefshme për çdo kandidat për kryetar bashkie.
2. Numëruesi i parë hap në mënyrë të plotë çdo fletë votimi, i vendos një nga një fletët e votimit në kamerën regjistruese, fillimisht nga faqja e pasme, jo më pak se 3 (tre) sekonda, në mënyrë që të shihen qartë në monitor vula e KQV-së dhe Vula e Kryetarit të KQV-së.
3. Gjatë shfaqjes të fletës së votimit, nga faqja e pasme Numëruesi i Parë verifikon nëse fleta e votimit:
 - i) ka të njëjtën madhësi, formë dhe ngjyrë, me fletën e votimit të miratuar nga KQZ-ja;
 - ii) është vulosur me vulën e KQV-së dhe me vulën e kryetarit të KQV-së;

- iii) në fletën e votimit, janë bërë shënime, shenja apo nënshkrime që bëjnë të mundur identifikimin e zgjedhësit.
4. Gjatë kryerjes së kësaj procedure, numëruesi i parë, shprehet me zë të lartë vetëm për fletët e votimit, të cilat i konsideron të pavlefshme gjatë vlerësimit nga faqja e pasme.
 5. Në rast se ndonjëri nga anëtarët e Grupit të Numërimit ose ndonjë prej vëzhguesve të subjekteve zgjedhore, nuk është dakort me vlerësimin e numëruesit të parë, ky i fundit e vendos fletën e votimit të kundërshtuar në vendin e caktuar për fletet e votimit të kontestuara dhe vijon me fletën tjetër të votimit. Kjo fletë votimi, do të vlerësohet përsëri nga Grupi i Numërimit, në momentin e rivlerësimit të votave.
 6. Në rast se, gjatë kryerjes së kësaj procedure, për fletën e votimit të vlerësuar e pavlefshme, nuk ka patur kontestime, atëherë ajo vendoset në vendin e caktuar për votat e pavlefshme mbi tavolinën e punës së GNV-së.
 7. Vlerësimi i votave fillon menjëherë, pas vlerësimit të fletës së votimit nga faqja e pasme.
 8. Grupi i Numërimit për vlerësimin e çdo vote, synon të identifikojë sa të jetë e mundur qëllimin e zgjedhësit për subjektin zgjedhor / kandidatin për kryetar bashkie.
 9. Vota të vlefshme janë vetëm fletët e votimit në të cilat, nuk ka asnjë nga rastet e parashikuara në nenin 117, pika 3 të ligjit nr. 10019, datë 29.12.2008 “Kodi Zgjedhor i Republikës së Shqipërisë”, i ndryshuar, dhe është votuar qartësisht vetëm për njërin nga subjektet zgjedhore/kandidatin për kryetar bashkie në fletën e votimit.
 10. GNV-ja vlerëson shprehjen e vullnetit të votuesit, duke ju referuar por pa u kufizuar në modelet ilustruese bashkëlidhur këtij vendimi.
 11. Në rast se nuk ekziston asnjë nga rrethanat e pavlefshmërisë së votës të parashikuar në nenin 117, pika 3, të Kodit Zgjedhor, dhe në fletën e votimit:
 - i. është votuar qartësisht vetëm për njërin nga subjektet zgjedhore/ kandidatin për kryetar bashkie;
 - ii. nuk janë bërë shënime në favor ose disfavor të subjekteve të caktuara zgjedhore;
 - iii. nuk është votuar për një person apo subjekt që nuk është në fletën e votimit;
 - iv. nuk është votuar për më shumë se një nga subjektet zgjedhore/ kandidatë për kryetar bashkie në fletën e votimit.

Numëruesi i parë i Grupit të Numërimit, çmon dhe pastaj u propozon për vlerësim anëtarëve të tjerë, se për cilin subjekt zgjedhor/kandidat për kryetar bashkie është votuar.

12. Numëruesi i parë, gjatë kryerjes së kësaj procedure, është i detyruar t’ia tregojë çdo fletë votimi anëtarëve të grupit të numërimit dhe të vendosë çdo fletë votimi në kamerën

regjistruese, jo më pak se 4 sekonda, në mënyrë që të shikohet qartësisht në monitor shenja, e cila tregon vullnetin e zgjedhësit.

13. Gjatë shfaqjes së fletës së votimit në kamerën regjistruese, numëruesi i parë i Grupit të Numërimit, bën vlerësimin e votës me zë të lartë.
14. Në rast se anëtarët e Grupit të Numërimit dhe vëzhguesit e subjekteve zgjedhore në numërim, janë dakort me vlerësimin e numëruesit të parë, fleta e votimit ndahet sipas vlerësimit dhe vendoset në vendin e caktuar për partinë politike, koalicionin apo kandidatin e propozuar nga zgjedhësit për të cilin është votuar. Numëruesi i parë, merr fletën tjetër të votimit dhe ndjek të njëjtën procedurë.

Neni 18

Kontestimi dhe Rivlerësimi i Votës

1. Në rast se ndonjëri nga anëtarët e Grupit të Numërimit ose vëzhguesit e tavolinës së numërimit përkatëse, nuk është dakort me vlerësimin e numëruesit të parë, ky i fundit e vendos fletën e votimit të kundërshtuar në vendin e përcaktuar për fletët e votimit të kontestuara dhe vijon me fletën tjetër të votimit.
2. Kontestimi i votës bëhet duke ngritur dorën e duke thënë “NUK JAM DAKORT”.
3. Në përfundim të numërimit të fletëve të votimit të kutisë përkatëse të votimit, Grupi i Numërimit rivlerëson fletët e votimit të kontestuara.
4. Rivlerësimi bëhet nga Grupi i Numërimit dhe nuk i nënshtrohet procesit të shfaqjes së fletëve të votimit të kontestuara në kamer.
5. Gjatë procesit të rivlerësimit, vëzhguesit e subjekteve zgjedhore, nuk kanë të drejtë të kontestojnë vlerësimin e votës dhe as të kërkojnë rishfaqjen e votave në monitor. Në çdo rast, vëzhguesit informohen për përfundimin e rivlerësimit.
6. Në rast se, edhe pas rivlerësimit nga GNV-ja, ka fletë votimi të kontestuara nga të paktën një anëtar i GNV-së, atëherë GNV-ja thërret KZAZ-në, për vlerësimin e votave të kontestuara të asaj kutie.
7. KZAZ-ja bën në çast vlerësimin e secilës fletë votimi të kontestuar dhe merr vendim në lidhje me të, duke e vlerësuar atë votë të vlefshme apo votë të pavlefshme. Rezultati i shpallur nga KZAZ-ja shënohet në librin e protokollit të KZAZ-së dhe përfshihet në tabelën përkatëse të rezultatit të qendrës së votimit që harton Grupi i Numërimit të Votave.
8. Për secilën fletë të kontestuar, numëruesi i parë i Grupit të Numërimit shënon në pjesën e prapme të saj, qartë, arsyet e kontestimit. Numri i përgjithshëm i fletëve të votimit të kontestuara për QV-në përkatëse, shënohet nga GNV në Procesverbalin përkatës miratuar me vendim të KQZ-së.

9. Në përfundim të nxjerrjes së rezultatit për QV përkatëse, fletët e votimit të cilësuara si të kontestuara dhe procesverbali përkatës futen në zarfin e “FLETËVE TË VOTIMIT TË KONTESTUARA”.

Neni 19

Numërimi i Votave të çdo kandidati për kryetar bashkie

1. Pas numërimit dhe vlerësimit të votave për çdo kuti votimi, numëruesi i parë numëron votat për çdo kandidat për kryetar bashkie. Pas çdo numërimi, shifrën ia bën të ditur anëtarëve të Grupit të Numërimit dhe vëzhguesve të subjekteve zgjedhore. Në rast se kërkohet nga ndonjë anëtar i Grupit të Numërimit, numëruesi i parë është i detyruar të rifillojë edhe një herë numërimin e votave për atë kandidat.
2. Në rast se, edhe pas këtij numërimi të dytë ka përsëri kundërshtime, numëruesi i parë ose anëtari kundërshtues, njofton KZAZ-në nëpërmjet ngritjes së dorës. Ngritja e dorës pezullon çdo veprim të mëtejshëm të GNV-së, deri në marrjen e vendimit nga KZAZ-ja. KZAZ-ja numëron në vend votat për kandidatin, objekt kundërshtimi dhe urdhëron Grupin e Numërimit të shënojë shifrën e vendosur prej saj në tabelën e rezultateve për atë qendër votimi.

Neni 20

Nxjerrja e rezultatit të zgjedhjeve për kandidatët për kryetar bashkie nga Grupi i Numërimit për qendrën e votimit

1. Në përfundim të procedurës së numërimit dhe vlerësimit të votave për qendrën e votimit, numëruesi i parë së bashku me anëtarët e Grupit të Numërimit, plotësojnë tabelën e rezultateve të kësaj QV-je, sipas modelit të miratuar nga Komisioneri Shtetëror i Zgjedhjeve. Para plotësimit të tabelës së rezultateve të QV-së përkatëse, Grupi i Numërimit të Votave kontrollon dhe sigurohet që:
 - a) numri i fletëve të votimit të gjetura në kuti, të jetë i barabartë me shumën e votave të pavlefshme dhe me votat e vlefshme;
 - b) numri i votave të vlefshme të jetë i barabartë me shumën e votave të vlefshme të shpërndara për kandidatët për kryetar bashkie të shënuara në fletën e votimit.
2. Në rast se anëtarët e GNV-së kanë kundërshtime për rezultatet e pasqyruara në tabelë, bëjnë shënimet në rubrikën përkatëse të tabelës së rezultateve të Grupit të Numërimit. Anëtarët e Grupeve të Numërimit janë të detyruar të nënshkruajnë, tabelën e rezultateve të QV-së, votat e së cilës i kanë numëruar. Tabela e rezultateve, e plotësuar nga anëtarët e Grupit të Numërimit, duke përfshirë dhe kundërshtimet, nëse ka, shfaqet në kamera për jo më pak se 4 (katër) sekonda dhe i dorëzohet menjëherë dorazi KZAZ-së.

3. Nëse ndonjë nga vëzhguesit e tavolinës ku u krye numërimi ka kundërshtime në lidhje me rezultatet e pasqyruara në tabelë, ato shënohen menjëherë në Librin e Protokollit të KZAZ-së.
4. KZAZ dërgon në rrugë elektronike në KQZ, për çdo QV, informacionin për rezultatet e zgjedhjeve menjëherë pas marrjes së tabelës së rezultateve nga GNV-ja. Ky process vazhdon deri në përfundimin e vlerësimit të numërimit të votave dhe dorëzimit të të gjitha tabelave të rezultateve prej GN-ve.
5. Tabela e rezultateve për QV-në, e printuar në 5 (pesë) kopje dhe e firmosur nga anëtarët e GN-së, pas verifikimit të saktësisë u jepet, kopja e parë me shenjë dalluese nga të tjerat, KZAZ-së dhe të tjerat anëtarëve të GN-së. Anëtarëve të KZAZ-së si dhe subjekteve zgjedhore, nëse i kërkojnë u jepen fotokopje të vulosura nga sekretari i KZAZ-së me vulën e KZAZ-së. Një kopje e tabelës së rezultatit të GNV-së, e vulosur me vulën e KZAZ-së, afishohet nga sekretari i KZAZ-së, në vendin e caktuar në VNV për këtë qëllim.

Neni 21

Mbyllja e kutisë me fletët e votimit

1. Pas nxjerrjes së rezultatit dhe plotësimit të tabelës së rezultateve të QV-së nga GNV-ja, sipas modelit të miratuar nga Komisioneri Shtetëror i Zgjedhjeve, fletët e votimit futen në zarfe të ndara, sipas kandidatëve për kryetar bashkie. Votat e pavlefshme futen në zarfin “VOTA TË PAVLEFSHME”, fletët e votimit të kontestuara janë grupuar më vete dhe futen në zarfin me shënimin “FLETË VOTIMI TË KONTESTUARA”.
2. Më pas të gjitha këto zarfe, përfshi zarfin me procesverbalin për Hapjen e Votimit dhe zarfin me Procesverbalin e Mbylljes së Votimit, dhe zarfin me Procesverbalin e Vulosjes, futen në kutinë e votimit e cila mbyllet me vula me kode sigurie të reja. Kopje e procesverbalit të vulosjes i dorëzohet sekretarit të KZAZ-së, i cili përgjigjet për administrimin e tyre si dhe vëzhguesve të subjekteve zgjedhore.
3. Grupi i Numërimit merr nga stiva e kutive të votimit, kutitë me fletët e votimit të qendrës tjetër të votimit, vetëm pasi ka dërguar në vendin e caktuar brenda sallës së Vendit të Numërimit të Votave kutinë e përpunuar dhe i ka dorëzuar KZAZ-së tabelat e rezultateve të asaj Qendre Votimi.

KREU V
NXJERRJA E TABELËS PËRMBLEDHËSE
TË REZULTATIT TË ZGJEDHJEVE NGA KZAZ-JA

Neni 22

Nxjerrja e tabelës përmbledhëse të rezultateve nga KZAZ-ja për kandidatët për Kryetar Bashkie

1. Në përfundim të numërimit të të gjitha kutive të votimit për kandidatët për kryetar bashkie të të gjitha QV-ve, sekretari i KZAZ-së kërkon nga operatori të printojë nga baza elektronike e të dhënave Tabelën Përmbledhëse të Rezultateve për Zonën e Administrimit Zgjedhor, në të cilën pasqyrohen rezultatet e çdo kandidati për çdo qendër votimi.
2. Tabela Përmbledhëse e Rezultateve të Zgjedhjeve të ZAZ-së për kandidatët për kryetar bashkie, e printuar pasi kontrollohet nga anëtarët, miratohet me vendim të KZAZ-së sipas modelit të miratuar nga Komisioneri Shtetëror i Zgjedhjeve. Pas miratimit, sekretari i KZAZ-së udhëzon operatorin të skanojë dhe dërgojë në rrugë elektronike në KQZ, vendimin e KZAZ-së për miratimin e Tabelës Përmbledhëse të Rezultateve së bashku me Tabelën Përmbledhëse përkatëse për ZAZ-në, të firmosur nga anëtarët e KZAZ-së.
3. Në rast se KZAZ-ja nuk arrin të marrë vendim për miratimin e Tabelës Përmbledhëse të Rezultateve të ZAZ-së, kryetari ose të paktën dy anëtarë të KZAZ-së dërgojnë çështjen për shqyrtim në KQZ.
4. Kopje të Tabelës Përmbledhëse të Rezultateve të ZAZ-së, të vulosura nga sekretari i KZAZ-së me vulën e KZAZ-së, u jepen anëtarëve të KZAZ-së dhe vëzhguesve të subjekteve zgjedhore, nëse i kërkojnë.
5. KZAZ para fillimit të numërimit të votave për kandidatët për kryetar bashkie, kryen kopjimin e materialit filmik të procesit të vlerësimit të votave.
6. Tabelat e rezultateve për QV-në, si për kandidatët për kryetar bashkie, të printuara e të firmosura nga GN-ja dhe tabelat e rezultateve të plotësuara me shkrim dore nga GN-ja, i bashkëngjiten njëra-tjetrës, shërbejnë si dokumentacion zyrtar dhe dorëzohen dorazi nga KZAZ-ja në KQZ, së bashku me Tabelat Përmbledhëse të Rezultateve për ZAZ-në. Një kopje e tabelës së rezultatit të GNV, e vulosur me vulën e KZAZ-së, afishohet nga sekretari i KZAZ-së, në vendin e krijuar në VNV për këtë qëllim.
7. KZAZ-ja Nr. 19, Bashkia Diber, KZAZ-ja nr. 26 Bashkia Vorë dhe KZAZ-ja nr. 43, Bashkia Rrogozhinë shpallin kandidatin fitues për kryetar të njësisë së vetëqeverisjes vendore.



8. Komisioneri Shtetëror i Zgjedhjeve shpall kandidatët fitues për kryetar të njësive të qeverisjes vendore në bashkitë Shkodër, Durrës dhe Lushnjë.

Neni 23

Hyrja në fuqi dhe ankimi

1. Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.
2. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit Tiranë, brenda 5 (pesë) ditëve nga shpallja e tij

Ilirjana NANO – Kryetare

Arens ÇELA – Anëtar

Dritan ÇAKA – Anëtar

Helga VUKAJ – Anëtare

Muharrem ÇAKAJ - Anëtar